

АЙМАҚТАНУ - ХАЛЫҚАРАЛЫҚ ҚАТЫНАСТАР САЛАСЫНДАҒЫ ЖАҢА МАМАНДЫҚ

Бүгінгі таңда әл-Фараби атындағы Қазақ ұлттық университеті еліміздегі бірқатар мамандықтарды даярлайтын білім және ғылым ордасы болып табылады. Өйткені ол еліміздегі тіпті әлемдегі елеулі университеттердің қатарында десек те болады. Халықаралық QS рейтингіндегі әлемнің 800 университеті арасында әл-Фараби атындағы Қазақ ұлттық университетінің 236-орынды иеленуінің өзі үлкен жетістік деп айта аламыз. Университет бұл жетістіктерге заман ырғағына сай жетілудің арқасында қол жеткізіп отыр.

Әл-Фараби атындағы Қазақ ұлттық университеті әлемнің ең ірі 418 халықаралық жоғары оқу орындарымен ынтымақтастық орната отырып, заманауи халықаралық білім бағдарламаларын жүзеге асыруда. Университет құрамындағы халықаралық қатынастар факультеті еліміздің тәуелсіздігінің алғашқы айларында құрылған болатын. Бүгінгі күні факультет шеңберінде халықаралық қатынастар, халықаралық құқық, аймақтану, әлемдік экономика саласының мамандары дайындалуда. Аталмыш мамандықтар халықаралық аккредиттеуден жоғары деңгейде өткен болатын. Солардың ішінде «аймақтану» мамандығы заман талабына сай жаңа бағыттағы мамандарды даярлау болып табылады. Аймақтану мамандығы елімізде алғаш рет әл-Фараби атындағы Қазақ ұлттық университетінің халықаралық қатынастар факультетінде ашылған болатын. Мамандықтың ашылуына ұйытқы болған факультеттің профессорлық-оқытушылық құрамы аймақтану мамандығы бойынша Қазақстан Республикасының Мемлекеттік жалпыға міндетті білім беру стандарттары мен типтік оқу бағдарламаларының да негізгі әзірлеушілері болып табылады.

Халықаралық салада аймақтану мамандығы нақты қандай да бір аймақ елдерін кешенді зерттеуге бағытталған. Аймақтану мамандығының басымдылығы белгілі бір аймақ елдерінің саяси-экономикалық, мәдени, діни, әлеуметтік, демографиялық және тағы басқа қырларының даму ерекшеліктері мен орын алған үдерістердің астарын сараптауға ерекше назар бөлетіндігінде. Сондықтан да аймақтану мамандарын даярлау бүгінгі күнгі заман талабының сұранысынан туындап отыр. Әлемдегі кез келген аймақ елдерінің саяси, әлеуметтік, экономикалық мәселелерін, мейлі әртүрлі халықтар мен әртүрлі дін өкілдерінің өзара қарым-қатынастарының салдарынан туындаған мәселелеріне сараптама жасауда аймақтанушы маман өзінің жан-жақты біліктілігімен ерекшеленеді.

Сондықтан да әл-Фараби атындағы Қазақ ұлттық университетінің халықаралық қатынастар факультетінде ашылған аймақтану мамандығының бакалавр студенттері әлем

аймақтарын, атап айтқанда Батыс Еуропа, АҚШ және Канада, Азия-Тынық мұхит аймағы елдері, Таяу және Орта шығыс Азия елдері, Орталық Азия аймағы елдерін кешенді түрде зерттейді. Яғни студенттердің таңдауы бойынша айқындалған аймақ елдеріне қатысты олардың тарихы, саяси жүйесі, сыртқы саясаты мен экономикасы, мәдениеті, ғылымы және білім беру жүйесі жөнінде дәрістер оқылады. Сонымен қатар аймақтану мамандығы студенттері халықаралық аймақтану, әлем елдері мен аймақтарының тарихы, халықаралық қатынастардың жүйелілік тарихы, дипломатиялық қызметтің негіздері, мемлекеттік протокол және этикет, келіссөздер жүргізу шеберлігі, халықаралық қатынастар жүйесіндегі аймақтардың қазіргі мәселелері, аймақтық қауіпсіздік және аймақтық қақтығыстарды шешу мәселелері және тағы басқа пәндер бойынша жүйелі түрде дәріс тыңдайды. Аймақтану мамандығында студенттердің таңдауы бойынша екі шет тілін меңгеру белгіленген. Халықаралық аймақтану пәнін оқыту барысында студенттер аймақтанудың демографиялық, конфессионалдық, қоныстандыру, этникалық факторлары жайында, әлем елдерінің жіктелуі, әлемнің саяси картасының қалыптасуы, аймақтық бірігулер, әлем аймақтарының инфрақұрылымдары жайында жан-жақты мағлұматтар беріледі. Аймақтану мамандығының бакалавр студенттері факультетімізде магистратурада және докторантурада бюджеттік негізде өздерінің білімдерін жалғастыру мүмкіншілігіне ие.

Аймақтану мамандығын тәмамдаған түлектер мемлекеттік билік және жергілікті басқару органдарында, еліміздің Сыртқы істер министрлігінде, шетелдегі дипломатиялық және консулдық мекемелерде, шетелдік серіктестермен сыртқы экономикалық, мәдени, ақпараттық қызметпен айналысатын кәсіпорындар, ұйымдар, мекемелердің сараптамалық органдарында, Қазақстандық және шетелдік компаниялардың консалтингті және ақпараттық-сараптамалық құрылымдарында, ғылыми-зерттеу және білім беру орталықтарында қызмет ете алады.

Бүгінгі күні аймақтану мамандығы бойынша білім алған түлектеріміз республиканың жас білікті мамандары ретінде жауапты қызметтерде жетекшілік рөлге де ие болуда. Олар білікті маман ретінде еліміздің ұлттық мүддесін қорғау саласында әртүрлі қызметтерді абыроймен атқаруда.

А. ӘЛІПБАЕВ, Б. БӨЖЕЕВА,
әл-Фараби атындағы ҚазҰУ,
халықаралық қатынастар факультетінің
доценттері.



«ЖАСЫЛ ЕЛ» ЖАСТАР ЕҢБЕК ЖАСАҒЫ

Құрметті аудан жастары! Қаратап аудандық «Жасыл ел» штабы 16-29 жас аралығындағы жастарды жазғы маусымдық жұмысқа шақырады.

Мекен-жайымыз: Үштөбе қаласы, Т. Құсморданов көшесі 21, 1-қабат, 8-кабинет, Аудандық жастар ресурстық орталығы.